

Հ. Ս. Խառնյան

1919 թ. ԱՆԳԼՈՒԻՐԱՆԱԿԱՆ ՊԱՅՄԱՆԱԳԻՐԸ ԱՆԳԼԻԱԿԱՆ ՈՒ ԻՐԱՆԱԿԱՆ ՊԱՅՄԱՆԱԳՐՈՒԹՅԱՆ ԳՆԱՀԱՏՄԱՍԻ

Առաջին համաշխարհային պատերազմին նախորդող տարիներին Անգլիան և ցարական Ռուսաստանը Իրանը բաժանել էին ազդեցության ոլորտներին, որը բնականաբար իր հետ բերում էր երկրի քաղաքական և տնտեսական ստրկացումը, մի հանգամանք, որը բավականին ծանր էր իրանական ժողովրդի համար։ Պատերազմի տարիներին, չնայած Իրանը չեզոք երկիր էր համարվում, սակայն նա դարձավ պատերազմական գործողությունների թատերաբեմ։

Հոկտեմբերյան Սոցիալիստական Մեծ ռևոլյուցիան շրջադարձային ազդեցություն ունեցավ Իրանում իշխող դրության վրա։ Ռևոլյուցիայի անմիջական ազդեցության ներքո 1917—1921 թթ. Իրանում ծավալվեցին ազգային ազատագրական հզոր շարժումներ։

Իրանի ժողովրդական մասսաները ողջունեցին Սովետական կառավարության բոլոր այն ակտերը, որոնք ուղղված էին Իրանի անկախության և ազատության ամրապնդման նպատակին։

Սակայն, Իրանից ռուսական զորքերի հեռացմանը հետևեց անգլիական զորքերի առաջխաղացումը և ամբողջ Իրանի օկուպացիան։ Անգլիական իմպերիալիստների հետապնդած նպատակների մասին վկայում են հենց անգլիական պատմաբանները և քաղաքական գործիչները, որոնք ամեն կերպ աշխատում են «կարմիր վտանգի» բողոք տակ արդարացնել իրենց զավթողական քաղաքականությունը։ Այսպես օրինակ, պատճառաբանելով այն «էֆեկտիվ հսկողություն» անհրաժեշտությունը, որ անգլիացիները հաստատեցին Իրանում, Անգլիայի արտաքին գործերի մինիստր Քերզոնը իր մի պաշտոնական հուշագրում գրում էր. «Ռուսական ռևոլյուցիայից հետո Իրանի հյուսիսում բոլշևիկյան ներխուժման վտանգ ստեղծվեց։ Միևնույն ժամանակ հյուսիս-արևմուտքում թուրքերը և գերմանացիները, որոնք անառարկելիորեն գրավել էին Կովկասը, սպառնում էին ներթափանցել սահմանամերձ Ադրբեջանի նահանգը, որը մի պահ սպառնաց մայրաքաղաքին և համարյա ստիպեց պարսկական կառավարությանը փախուստի դիմել։ Այդ ժայթքումը կանխելու և այդ ծովով դեպի Ասիա մուտք գործելու գերմանացիների պլաններն խանգարելու համար մենք ստիպված ենք Բաղդադի ուղղությամբ ռազմական մի մեծ ուժ ուղարկել...»¹։ Իրանական քաղաքական գործիչներից Աբդոլլահ Մոսթոֆին մերկացնելով Քերզոնի նման պնդումները, գրում է. «...Լորդ Քերզոնը հավակնում է, որ Անգլիան Իրանը փրկեց, նախ՝ գերմանացիների դավադրությունից, երկրորդ

¹ Documents on British Foreign Policy 1919-1939, First series, vol. IV, 1919. London, 1952, էջ 1120.

թուրքերի հարձակումից և, երրորդ՝ բուլղարիկների ներխուժումից»։ Մոսթոֆին ավելացնում է, որ ռուսական զորքերը հեռանալուց հետո անգլիացիները, գրավեցին հյուսիսային նահանգները, «բայց այդ ուժերի կենտրոնացումը՝ ոչ լիե իրանցիներին պաշտպանելու, այլ Դենիկիներին և Վրանգելին օգնելու համար էր»։ Մոսթոֆին պատասխանելով Քերզոնի հավակնությանը, որ իբր անգլիացիները Իրանը փրկեցին ռուսական բուլղարիկների հարձակումից, ասում է, որ դա ևս «փրականությանը չի համապատասխանում»։ «Լորդ Քերզոնը ուզում է անգլիական ուժերի մի ամբողջ տարի Իրանում մնալ բուլղարիկների հարձակումներից Իրանը պաշտպանելու միջոցառում ներկայացնել... Գուցե կասեք, եթե դուք չլինեիք բուլղարիկները կգային և բոլոր իրանցիներին կենդանի կուլ կտային։ Ոչ, մեծապատիվ լորդ, այդպես չէ։ Ներողություն եմ խնդրում, ներեցեք, բուլղարիկները ձեր մի խումբ պարտված զինվորներից, որոնց դիմացկանությունն արդեն փորձել էին Դենիկիներին և Վրանգելին դեմ մղած մարտերում և հատկապես Բաքվի կոթիվներում, ոչ մի վախ չունեին և լավ գիտեին, թե դուք ինչ եք ձեզանից ներկայացնում»²։

Իրանում իրենց զավթողական քաղաքականությունը օրինականացնելու համար 1919 թ. օգոստոսի 9-ին անգլիական իմպերիալիստները Իրանին թելադրեցին անգլո-իրանական տխրահռչակ պայմանագիրը, երկիրը փաստորեն դարձնելով Անգլիայի պրոտեկտորատը։ 1919 թ. օգոստոսի 9-ին ստորագրված այս պայմանագիրը նպատակ ունի անգլիացիներին կողմից Իրանի փաստական անեքսիային իրավաբանական ձևակերպում տալ։

Պայմանագիրը կոչվում էր «Իրանի առաջադիմության և բարեկեցության համար բրիտանական օգնության մասին», որը ստորագրեցին Իրանի պրեմիեր-մինիստր Վոսուգ էղ-Դոլեն և Թեհրանում անգլիական դեսպան Քոքսը։ Պայմանագրի հոդվածների ուսումնասիրումը ցույց է տալիս, որ այն շատ հեռու էր «Իրանի առաջադիմության և բարեկեցության» համար որևէ արժեք ունենալուց։

Այսպես. պայմանագրի երկրորդ հոդվածի համաձայն Անգլիան Իրան էր ուղարկում իր մասնագետներին, խորհրդականներին, իրանական տարբեր մինիստրությունները ղեկավարելու համար։ Այս հոդվածը ուղղակիորեն հակասում էր առաջին հոդվածին, քանի որ «անկախ» պետության մինիստրությունները պիտի ղեկավարեին անգլիացիները, որոնք բնականաբար ոչ թե Թեհրանի այլ Լոնդոնի կարգադրությունները պիտի կատարեին։ Այս հոդվածի համաձայն էր, որ դեռ պայմանագիրը չհաստատված, Իրան եկաւ անգլիական ֆինանսական միսիան՝ էրմիտաժ Սմիտի գլխավորությամբ։ Անգլիական խորհրդականների գործունեության մասին Բալֆուրը գրում է. «Առավել ևս դժվար է հավատալ..., որ մի փոքր խումբ խորհրդականներ՝ առանց իրենց

عبدالله مستوفی شرح زندگانی من - انتشارات اجتماعی و اداری دوره 2
قاجار به قسمت اول از جلد سوم از دایره قرارداد و ثوق الدوله تا سقوط ضیاء
۱۹۶۵ تهران. ۱۹۶۵. Արդուլահ Մոսթոֆին, Իմ կենսագրությունը կամ Կաջարների
չրջանի հասարակական ու ազմինիստրատիվ պատմությունը, երրորդ հատորի առաջին
մասը, պայմանագրի ստորագրող Վոսուգ էղ-Դոլեի կարիքներից, մինչև Զիա էղ-Դինի ան-
կումը, Թեհրան, 1943, էջ 165 (հեռագրային Արդուլահ Մոսթոֆին...)։

² Agreement between His Britanic Majesty's Government and the Persian Government signed at Teheran, August 1919, London, 1919.

կառավարության ուժեղ հովանավորության, կկարողանան անցկացնել այնպիսի ռեֆորմներ, որոնք տրամագծորեն հակառակ էին պարսիկների շահերին»⁴:

Երրորդ հոգվածի համաձայն Անգլիան խոստանում էր Իրան ուղարկել զինվորականներ և զենք՝ իրանական զինված ուժերը վերակազմելու համար: Սա նշանակում է, որ Իրանում պետք է ստեղծվեր գործունակ մի բանակ՝ ռեուլյուցիոն շարժումները երկրի ներսում ճնշելու և Սովետական Ռուսաստանի նկատմամբ ապագայում կազմակերպվելիք ագրեսիվ պլաններին մասնակցելու համար:

Ըստ չորրորդ հոգվածի, վերոհիշյալ բոլոր միջոցառումները կենսագործելու համար Իրանին տրվում էր երկու միլիոն ստեռլինգ վարկ՝ յոթ տոկոսով և յոթանասուն տարի ժամկետով: Իրանը այդ վարկը ստանալով՝ էլ ավելի կախման մեջ էր ընկնում Անգլիայից, եթե չավելացնենք անգամ այն, որ այդ դրամարի մի խոշոր մասը ուղղակիորեն պիտի գնար իրանական իշխող խավերի գրպանը, որպես օրինական, բայց քողարկված կաշառք:

Բալֆուրը, անդրադառնալով զինվորական և ֆինանսական այդ «օգնություններին», գրում է. «Նկատի ունենալով այն բազմական և ֆինանսական օգնության չափը, որ Իրանը այդ ժամանակ ստանում էր բրիտանական կառավարությունից, դժվար էր պայմանագիրը համարել որպես երկու անկախ ու ազատ պետությունների միջև կնքված պայմանագիր»⁵:

Հինգերորդ և վեցերորդ հոգվածների համաձայն անգլիացիները իրենց ձեռքն էին վերցնում Իրանի տրանսպորտը և երկաթգծի կառուցման իրավունքը: Մաքսային հարկերը նույնպես պետք է վերանայվեին հօգուտ Անգլիայի:

Անգլո-իրանական վերոհիշյալ պայմանագիրը, որը փաստորեն երկիրը վերածում էր Անգլիայի գաղութի, լայնորեն քննարկման է ենթարկվել անգլիական և իրանական պատմագրության մեջ: Այդ հարցի շուրջը ստեղծվել է ընդարձակ գրականություն, և հենց այդ պատճառով էլ նպատակահարմար ենք գտնում որոշ մանրամասնությամբ կանգ առնել տարբեր հեղինակների տված գնահատականներին:

Անգլիական որոշ քաղաքական գործիչներ և պատմաբաններ աշխատել են արդարացնել Անգլիայի քաղաքականությունը Իրանի նկատմամբ, հայտարարելով, որ իբրև Անգլո-իրանական պայմանագիրը նպատակ ուներ Իրանը փրկել քաոսային վիճակից և նրան տանել դեպի «բարգավաճում և պրոգրես»: Պայմանագրի հեղինակ Քերզոնը իր հուշագրերից մեկում գրում էր, որ պայմանագիրը դեռ չի նշանակում, որ «մենք Իրանի համար մանդատ... ենք ըստացել կամ կստանանք, որ Իրանը մեզ է հանձնել իր ազատությունների որևէ մասը... այլ իրանական կառավարությունը գիտակցելով, որ մենք Իրանի ճակատագրով սերտ շահագրգռված միակ հարևան մեծ պետությունն ենք, ի վիճակի ենք ու կամենում ենք օգնել նրան և այդ հարցում անշահախնդիր ենք, որոշեց իր ազատ կամքով խնդրել մեզ օգնելու Իրանին վերականգնելու իր բարեկեցությունը: Եթե հարցնեն, թե, ինչու մենք ընդհանրապես մեր վրա վերցրինք այդ պարտավորությունը և ինչու Իրանը չթողինք իր ճակա-

⁴ G. M. Balfour, Recent Happennings in Persia, London, 1922, էջ 118:

⁵ Ն ու չ ն ա ե դ ու մ, էջ 123:

տագրին, որպեսզի նա փոխ իր գունեղ անկման մեջ, պատասխանը այն է, որ Իրանի աշխարհագրական դիրքը, այդ երկրում մեր ունեցած շահերի աստիճանը և մեր Արևելյան կայսրության ապագա անվտանգությունը ինչպես վերջին հիսուն տարիների ընթացքում, այնպես էլ ներկայումս, մեզ համար անկարելի է դարձնում անտարբեր լինել այն ամենի նկատմամբ, ինչ կատարվում է Իրանում... Իհու ավելին, եթե Իրանը մենակ թողնվի, ապա հիմքեր կան վախենալու, որ նա կգրավվի հյուսիսից եկող բոլշևիկյան ազդեցությամբ: Վերջապես, Իրանի հարավ-արևմտյան անկյունում մենք նախնային մեծ հարստություններ ունենք, որոնք սպասարկում են բրիտանական ծովային ուժին և որը մեզ իշխող դիրք է տալիս աշխարհի այդ մասում...»⁶:

Խոսելով պայմանագրի մասին, պատմաբան Վիլսոնը մի քայլ էլ առաջ է գնում, քան Քերզոնը: Նա գրում է. «Ինչ վերաբերում է փաստաթղթի տեքստին, որը ոչ մի գաղտնի հոդված չունի, ապա դա ներկայացնում էր մի խոհեմ և անկեղծ ծրագիր պարսկական ադմինիստրացիան վերականգնելու համար... Եթե մեջլիսը անմիջապես հրավիրվեր, նա հավանաբար կհաստատեր պայմանագիրը, որովհետև Թեհրանում կային մարդիկ, որոնք այդ պայմանագրի մեջ տեսնում էին ազգային վերածինդի սաղմերը և գտնում էին, որ այն, ամեն պարագայում, ավելի պակաս վտանգավոր է, քան բոլշևիկյան ռեժիմը...»⁷:

Քերզոնի և Վիլսոնի նման բացարձակությունները խիստ քննադատության են ենթարկել անգլիական այլ հեղինակներ: Մերկացնելով Քերզոնի վարած քաղաքականությունը Իրանի նկատմամբ, Դենիսը գրում է. «Լորդ Քերզոնը Իրանի գործերի կապակցությամբ հեղինակություն էր համարվում, բայց ավելի շատ հին Իրանի, քան թե նորի: Այդ պայմանագիրը իրականում շահի կառավարությունը դնում էր բրիտանական ղեկավարության տակ և փաստորեն, եթե ոչ անվանապես, հաստատում էր մի բրիտանական պրոտեկտորատ, և հենց, որպես այդպիսին, նա անհետացավ, քանի որ ոչ մի իրանական կառավարություն չէր համարձակվում վավերացնելու համար պայմանագիրը ներկայացնել մեջլիսին»⁸:

Իրանի նկատմամբ անգլիական իմպերիալիստների վարած քաղաքականության և 1919 թ. Անգլո-իրանական պայմանագրի ընդարձակ մերկացումներով հանդես է գալիս անգլիական ականավոր քաղաքական գործիչ Բալֆուրը. «Լորդ Քերզոնի,—գրում է նա,—այն հայտարարությունը, որ նա Իրանի լավագույն բարեկամն է, միայն զայրույթի, ծաղրի և արհամարհանքի մի պոռթկում առաջ բերեց ամբողջ երկրով մեկ, որտեղ նրան Իրանի խոշորագույն թշնամի և ճնշողն էին համարում»⁹:

Ըստ Բալֆուրի պայմանագիրը միակողմանի էր և մեծապես կասկած էր առաջացնում: Նրա կարծիքով անգլիական կառավարության վարած քաղաքականությունը տառնում էր դեպի կատաստրոֆ¹⁰:

⁶ Documents on British Foreign Policy, 1919—1939, First series, vol. IV, 1919, London, 1952, էջ 1120:

⁷ A. T. Wilson, Persia, London, 1932, էջ 141:

⁸ Dennis, The Foreign Policies of Soviet Russia, էջ 237:

⁹ G. M. Balfour, Recent Happenings in Persia, London, 1922, էջ 133:

¹⁰ Նույն տեղում, էջ 120:

Անգլո-իրանական պայմանագրի ստորագրուցիչ բնույթը չէին կարողանում թաքցնել մինչև իսկ ամերիկյան կառավարող շրջանները, որոնք ելնելով իրենց իմպերիալիստական շահերից, առանձին դեպքերում խոսում էին պայմանագրի հետապնդած նպատակների մասին:

1919 թ. սեպտեմբերի 12-ին սենատոր Նոքսը ամերիկյան սենատի արտաքին գործերի հանձնաժողովում հայտարարեց, որ «Անգլո-իրանական» այդ պայմանագիրը Իրանի սուվերենությունը հանձնեց Մեծ Բրիտանիային»¹¹։ Այնուհետև, հանդես գալով նույն հանձնաժողովի նիստերից մեկում, Իրանում ԱՄՆ-ի նախկին դեսպան Ռասելը հայտարարեց. «Բրիտանական կառավարության հետ կնքած այս նոր պայմանագրով Իրանը վաճառվել է Մեծ Բրիտանիային... Ասվում է, որ անգլիացիները պետք է ավանսավորեն 10 միլիոն դոլար այդ պայմանագրի համար: Տարօրինակ չէ, որ Անգլիան ուղղում է այսպիսի անլեզալ ձևով և համարյա ձրի գնել մի երկիր, որը երեք անգամ ավելի մեծ է, քան Ֆրանսիան»¹²։

Ինչպես են դնահատել պարսիկ հեղինակները անգլիական իմպերիալիստների այդ գաղութարարական քաղաքականությունը:

Պարսիկ բազմաթիվ հեղինակներից միայն երկուսն են հատկապես հանդես եկել Անգլիայի պաշտպանի դերում: Գրանցից մեկը ինտելիգենս սերվիսի հին գործակալ տխրահռչակ Սեյիդ Զիա էդ-Դինն է, մի անձնավորություն, որի քառասունամյա քաղաքական գործունեությունը ամբողջովին նվիրված է եղել անգլիական իմպերիալիզմի շահերի պաշտպանությանը:

Պայմանագիրը ստորագրվելուց հետո Սեյիդ Զիա էդ-Դինը Վոսուզ էդ-Դուլեի կառավարության կողմից ուղարկվում է Բաքու որպես իրանական կառավարության արտակարգ լիազոր ներկայացուցիչ: Այստեղ անգլիական իմպերիալիստների քաղաքականության դեմ առաջացած վրդովմունքը փարառելու նպատակով, նա 1920 թ. ուսերեն լեզվով հրատարակեց մի գրքույկ, որտեղ ցինիկորեն փորձում էր պաշտպանել Անգլո-իրանական պայմանագիրը: Գրքույկի առաջին իսկ էջում հեղինակը՝ խոսելով գիրքը հրատարակելու զրդապատճառների մասին, գրում է. «Իրանի վերածննդի նոր էպոխան սկսվում է Անգլո-իրանական պայմանագրի ստորագրման պահից, մի խոշորագույն կարևորություն ունեցող ակտ, որի նշանակությունը ես ուզում եմ բացահայտել, քանի որ Անգլիկոս գալու ժամանակվանից ես նկատում եմ, որ Անգլո-իրանական պայմանագիրը հասարակական կարծիքի և մամուլի կողմից մեկնարանվում է ոչ իրական իմաստով և նշանակությամբ»¹³։

Իրանի նկատմամբ անցյալում անգլիական իմպերիալիստների էքսպանսիոնիստական քաղաքականությունը իր հովանավորության տակ վերցնելով, Սեյիդ Զիա էդ-Դինը գրում է, որ Անգլիան միջամտել է միայն այն դեպքերում, երբ նրա շահերը վտանգվել են Ռուսաստանի կողմից և հետապնդել է բացառապես մի նպատակ՝ պաշտպանել Իրանը Ռուսաստանի ագրեսիվ մտադրություններից¹⁴։

¹¹ Senate Documents, May 19—Nov. 19, 1919, vol. 10, էջ 1011։

¹² Ն ու յ ն տ է դ ու մ, էջ 1012—8։

¹³ Сеид Зна эддин Таба-Габан, Новая эпоха в истории Персии и Англо-персидский договор, 2-ое изд., Баку, 1920, стр. 1.

¹⁴ Ն ու յ ն տ է դ ու մ, էջ 2։

խոսելով պատերազմից հետո Իրանում ստեղծված դրության և անգլիական իմպերիալիստների կողմից Իրանի օկուպացիայի մասին, հեղինակը գրում է. «Ո՞ւմ կարող էր Իրանը դիմել օգնություն խնդրելու:

...Միջին Արևելքի քաղաքականության մեջ շահագրգռված բոլոր տերություններին միայն պատմության մեջ շտեմարկված հեղինակություն և իշխանություն ունեցող Անգլիան էր գերիշխող դեր խաղում համաշխարհային քաղաքականության մեջ... Այսպիսով Իրանի խոշորագույն ճգնաժամի պահին Անգլիային դիմելը պատմական անհրաժեշտություն էր...

Մենք շատ լավ հասկանում ենք, որ մեր բոլոր իղձերը կարելի է իրականացնել միայն Անգլիայի համագործակցությամբ, քանի որ վերջինիս ճակատագիրը կապված է Իրանի ճակատագրի հետ:

...Եթե ես ասեմ, որ Անգլիայի հետ կնքած պայմանագրով մենք հասանք մեր բոլոր ցանկություններին և փափագներին, որի դիմաց նրան (Անգլիային—Հ. Ն.), բացի բարոյական շահից, ոչ մի նյութական օգուտ չենք տվել, ապա դա առաջ կբերի ընթերցողների զարմանք»¹⁵:

Ինչպես տեսնում ենք, հեղինակը ինքն էլ է զգում, որ իր ասածները համոզեցուցիչ չեն և կարող են միայն «զարմանք» առաջ բերել:

Իսկ ի՞նչ նպատակ էր հետապնդում Անգլիան: Սելիդ Ջիա էդ-դինը պատասխանում է. «Ապագա Ռուսաստանի և արագ տեմպով ամբողջ Ասիայում տարածվող հսկայական ռևոլյուցիայի բավականին հավանական վտանգը սարսափելի սպառնալիք է հանդիսանում Անգլիայի համար: Քաղաքակրթության տարածումը Իրանում, կարգ ու կանոնի ու անդորրի պահպանումը և երկրի հզորության վերականգնումը ինքնապաշտպանության համար, հանդիսանում են Անգլիայի կենսական շահերի ապահովման հիմնական պայմանները:

...Պետք են արդյոք նոր փաստարկումներ և բացատրություններ այն պարզամիտներին, որոնք բղավում են, թե պարսկական կառավարությունը իր հայրենիքը վաճառեց Անգլիային»¹⁶: Գնահատելով անգլիական իմպերիալիստների քաղաքականությունը Իրանում, հեղինակը հայտարարում է. «Ես համոզված եմ Իրանում Անգլիայի պետական հեռատեսական քաղաքականության նպատակահարմարությանը, որը ուղղված է պարսիկ ժողովրդի բարեկեցությանը և կատարյալ բացառում է այնպիսի ակտերի հնարավորությունը, որոնք հակասեին պարսիկ ժողովրդի իղձերին և ցանկություններին...»¹⁷:

Անգլիական իմպերիալիստների՝ Իրանում վարած քաղաքականության պաշտպանի դերում հանդես է գալիս նաև մի այլ պարսիկ հեղինակ՝ Մեհդի Մոջթահեդին, որը ինչպես ինքն է գրում, Իրանի և Անգլիայի հարաբերությունները որոշ ժամանակ ուսումնասիրելուց հետո այն արդյունքին է հասել, որ անգլիացիները երբեք Իրանի և իրանցիներին նկատմամբ «վատ մտադրություն չեն ունեցել», հետևաբար ձեռնամուխ է եղել մի առանձին աշխատություն գրելու և «իր այդ համոզմունքը հաստատելու»¹⁸:

¹⁵ Ն ու յ ն տ ե ղ ու մ, էջ 16—17:

¹⁶ Ն ու յ ն տ ե ղ ու մ, էջ 18:

¹⁷ Ն ու յ ն տ ե ղ ու մ:

¹⁸ مهدي مجتهدی ایران و انگلیس تهران ۱۹۴۷ (Մեհդի Մոջթահեդի, Իրան և Անգլիան, Թեհրան, 1947, էջ 3):

Ըստ Մեհդի Մոշթահեզու, Անգլիայի հեղինակության անկման և իմպերիալիզմի դեմ մղված ազգային-ազատագրական շարժման ամբողջ հանցանքը ընկնում է Սովետների վրա, քանի որ «նրանք մտադիր էին բռնի կերպով իրենց գաղափարը տարածել ամբողջ աշխարհում», իսկ «անգլիացիները կոմունիզմի տարածմանը դեմ էին», հետևաբար Սովետները սկսեցին ընդարձակ և զիտական սրտպագանդա մղել ընդդեմ Անգլիայի «և այդ պետությունը ներկայացրին որպես ռեակցիայի ամբողջ, նեխվածություն կենտրոն և աշխատավորության ու աշխարհի ազատության թշնամի»¹⁹:

Հեղինակը հանգամանորեն վերլուծում է Անգլո-իրանական պայմանագիրը և հասնում է այնպիսի ցինիզմի, որ այն համարում է «Իրանի ազատասերների և հայրենասերների խոշոր հաղթանակը»²⁰:

Տալով ամբողջ պայմանագրի գնահատականը, հեղինակը գրում է. «Ինչպես երևում է այն հետապնդում է Իրանի վերականգնման քաղաքականություն, որի համաձայն, հաղթահարելով իրանական ղեկավարների դիմադրությունը, Անգլիան ուզում էր իրականացնել այն ռեֆորմները, որոնց անցկացումը արգելակում էր ցարական Ռուսաստանը: Անգլիական կառավարությունը օգտվելով Իրանում Ռուսաստանի բացակայությունից, իրագործեց իր այդ մտադրությունը»²¹:

Բայց վերոհիշյալ երկու հեղինակների նման գնահատականները ջախջախիչ հարված են ստանում իրանական բազմաթիվ այլ պատմաբանների կողմից, որոնք խորը վերլուծելով անգլիական իմպերիալիստների գաղութարարական քաղաքականությունը, տալիս են համապատասխան ճիշտ գնահատական: Օրինակ, Աբբաս էկբալը «Իրանի ընդարձակ պատմությունը» իր աշխատության մեջ, որը միաժամանակ պաշտոնական ձեռնարկ է, գրում է. «Համաշխարհային պատերազմի վերջնալու պահին համարյա ամբողջ Իրանը անգլիացիների ազդեցության տակ ընկավ, և նրանք Իրանը այդ վիճակում պահելու համար խոչընդոտներ ստեղծեցին, որպեսզի Իրանի ներկայացուցիչները չկարողանան մասնակցել խաղաղության կոնֆերանսին: Վերջապես 1337 թ. շավալ ամսին (1919 թ. օգոստոս) Իրանի կառավարությունը ստիպեցին մի նենգ պայմանագիր ստորագրել, որը հայտնի դարձավ որպես 1919 թ. պայմանագիր և Իրանի զինվորական, տնտեսական ու մաքսային բոլոր բնագավառները դնում էր անգլիական խորհրդատուների մոնոպոլ տրամադրության տակ և Իրանը դարձնում Բրիտանիայի պրոտեկտորատը»²²:

Դոկտոր Աֆշարը Լոդանի համալսարանում քաղաքական գիտությունների դոկտորի կոչում ստանալու համար ներկայացրած իր դիսերտացիայում, խոսելով 1919 թ. պայմանագրի մասին գրում է. «Ինչ վերաբերում է 1919 թ. օգոստոսի 9-ի Անգլո-իրանական պայմանագրին, ապա մենք կարծում ենք, որ դա քաղաքական այնպիսի խոշոր սխալ է, որի նմանը երբեք չի եղել: Այդ պայմանագիրը վերջին հաշվով վատ ծառայություն էր հենց Անգլիային, Դա

¹⁹ Ն. Ուլյն տեղում, էջ 21:

²⁰ Ն. Ուլյն տեղում, 103:

²¹ Ն. Ուլյն տեղում:

²² عباس اقبال تاریخ مفصل ایران از سیدای مغول تا انقراض قاجار

۱۹۴۱ (Աբբաս էկբալ, Իրանի ընդարձակ պատմությունը մոնղոլների տիրապետությունից մինչև կաշաբների անկումը, Թեհրան, 1941, էջ 454):

Անգլիայի դեմ տրամադրեց ին իրանին և թե ուրիշ երկրներին, և Վերջապես՝ դա մեծապես վարկաբեկեց Մեծն Բրիտանիայի հեղինակությունը և արժանապատվությունը: Դիվանագիտական այս ակտը միաժամանակ թե՛ վնասակար էր և թե՛ անօգուտ»²³:

Պարսիկ բազմաթիվ հեղինակներից հատկապես պետք է երկուսին հիշատակել. որոնք հանդես են եկել անգլիական իմպերիալիստների դադումարաբեկան քաղաքականության ամենասուր քննադատությամբ: Դրանցից մեկը Աբուլֆազլ Կասեմին է՝ «Սև պատմություն կամ ընտանիքների իշխանությունը Իրանում» աշխատության հեղինակը: Կասեմին՝ անդրադառնալով անգլիական իմպերիալիստների ջերմ պաշտպան և պայմանագիրը ստորագրող ժամանակի պրեմիեր Վոսուզ էդ-Դոլեի ազդեցիկ քաղաքականությանը, գրում է. «Վոսուզ էդ-Դոլեի դավաճանության գլուխ գործոցը անգլիացիների հետ 1919 թ. պայմանագրի ստորագրումն էր»²⁴: Պատասխանելով Քերգոնի այն հայտարարությանը, որ Անգլիան Իրանին դնում է «բարյացակամ» պրոտեկտորատի տակ, հեղինակը գրում է. «Բարյացակամ պրոտեկտորատ տեղադրելը նման է դահիճի սրտացավ խրատին, որը դատապարտյալին ասում է, մի վախենա, գլուխդ մարմնիցդ կպոկեմ ծաղկի պես: Արդյոք մի որևէ ազգի պրոտեկտորատի և ստրկության գործում կարող է բարյացակամ մտադրություն լինել»²⁵:

Նույնիսկ անգլիական իմպերիալիստների հետապնդած նպատակների մասին, Կասեմին նշում է. «Սովետական իշխանություն ստեղծվելուց հետո այս նորաստեղծ պետության ազդեցության ծավալման առաջն առնելու համար անգլիացիները որոշեցին նրա շուրջը մի անթափանցելի երկաթյա քաղաքական պատ ստեղծել, որպեսզի նրանց քաղաքական իդեաները ճանապարհ չգտնեն դեպի դրսի աշխարհը՝ Անգլիայի գաղութների կենտրոնը: Վոսուզ էդ-Դոլեի ղեկավարացիան ցույց է տալիս, որ նա իր տերերի հակակոմունիստական նպատակներին լիովին տեղյակ էր: ...Այսպիսով պետք է իմանալ, որ Վոսուզ էդ-Դոլեն ուրիշ ոչինչ չէր, քան Անգլիայի հնազանդ և ենթակա գործակալը՝ որը ուզում էր մեզ հակակոմունիստական բլոկի մեջ մտցնել և նորաստեղծ պետության զայրույթն ու ատելությունը մեր դեմ ուղղել»²⁶:

Անգլիական իմպերիալիստների հետապնդած քաղաքականության խորը մերկացումով հանդես է գալիս իրանական մի այլ գործիչ՝ Արգոլահ Մոսթոֆին, իր «Իմ կենսագրությունը կամ Կաջարների շրջանի հասարակական և վարչական պատմությունը» աշխատության մեջ:

Մոսթոֆին դիմելով Վոսուզ էդ-Դոլեին գրում է. «Գուցե կարծում եք, որ Իրանը որևէ ուրիշ բան էլ ունի, որ դուք չեք նվիրել Անգլիային, և դրա համար տխրել եք, բայց մենք Ձեզ այդ կարծիքից և տխրությունից դուրս բերելու, ձեր սրտում ուրախություն մտցնելու համար ստում ենք. մի անհանգստացեք,

²³ Dr. Aphshar, La Politique Européenne en Perse. Quelque page de l'histoire diplomatique, 1931, էջ 1611

²⁴ ابو الفضل فاسمى. تاريخ سياه با حکومت خاندانها در ایران ۳ خاندان فوام السلطنة بجران (Աբուֆազլ Կասեմի, Սև պատմություն կամ ընտանիքների իշխանությունը Իրանում, 3, Կաթամ էս-Սալթանեի ընտանիքը, Թեհրան, 1932, էջ 133):

²⁵ Ն ու չ ն տ ե դ ու մ, էջ 154:

²⁶ Ն ու չ ն տ ե դ ու մ, էջ 156:

հենց այս ծառայություններով, որ դուր անգլիացիներին կատարեցիք, նրանց իրանցիներին ամեն ինչի տերը դարձրիք, կարող եք վստահ լինել, որ ինչպես Փարիզի զավեշտական թերթն է դրել, Իրանը հիսուն սանտիմով (մի արբասի) ծախեցիք անգլիացիներին»²⁷։

Անգլիական իմպերիալիստների քաղաքականությունը, անգլո-իրանական պայմանագիրը և Վոսուզ էդ-Դուլեի կառավարության դավաճանական դիրքավորումը մեծ բողոք առաջացրեց ամբողջ Իրանում։ Երկրի տարրեր վայրերում ժողովուրդը ոտքի ելավ իմպերիալիստների և ներքին ռեակցիոն շրջանների այդ դավադրության դեմ, ամենուրեք տեղի ունեցան զործադուլներ և միտինգներ, իսկ որոշ նահանգներում գործը հասավ մինչև իսկ զինված ապստամբություն։ Համաժողովրդական այդ դիմադրության մասին չեն կարողանում չխոսել մինչև իսկ իմպերիալիստական շահերի ներկայացուցիչները։ Սրինակ, Քերզոնը 1919 թ. օգոստոսի 16-ին, պայմանագրի ստորագրումից մի քանի օր հետո, մի հարցում էր ուղարկել Քոքսին այն կապակցությամբ, թե եվրոպական մի շարք թերթեր գրում են, «որ պայմանագիրը հասաբակական կարծիքի կողմից լավ չի ընդունվել։ Ի՞նչ փաստեր կան այդ մասին»²⁸։ Իսկ անգլիական «Թայմզ» թերթի թղթակիցը Թեհրանից այդ օրերին հաղորդում էր. «Ամեն օր աճում է Բրիտանիայի հակառակորդների թիվը»²⁹։

Անգլիական պատմաբան Թեմանդեյը իր «Փարիզի խաղաղության կոնֆերանսի պատմությունը» մեծածավալ աշխատության մեջ «Իրանի հակառակությունը պայմանագրին» վերնագիրը կրող հատվածում գրում է. «Շենց որ պայմանագիրը հրապարակվեց՝ բոլոր կողմերից հանդիպեց թշնամական քննադատության»³⁰։

Անգլո-իրանական պայմանագրի առաջացրած համաժողովրդական խոր վրդովմունքի մասին են վկայում հաև ամերիկյան պաշտոնական ներկայացուցիչների զեկուցումները։ Թեհրանում ամերիկյան դեսպան Քալզվերը 1919 թ. օգոստոսի 28-ին Վաշինգտոն ուղարկած իր զեկուցման մեջ գրում էր. «Վերջին պայմանագրի հանդեպ հասարակական զգացմունքների վճռական թշնամանքը մնում է անփոփոխ։ Երեկ երեկոյան ճախկին կաբինետի մի խումբ պաշտոնյաներ և քաղաքացիներ այցելեցին պրեմիեր մինիստրին՝ հայտնելու իրենց վրդովմունքն ու բողոքը Բողոքի բազմաթիվ միտինգներ տեղի ունեցան։ Որոշ դավառական քաղաքներ, որպես բողոքի ակտ, փակեցին շուկաները։ ...Շատ պարսիկներ ազնվորեն հավատացած են, որ պայմանագիրը վերջ է տալիս Իրանի անկախությանը...»³¹։

Թավրիզի ամերիկյան հյուպատոսի զեկուցումը նույնպես խոսում է այն մասին, որ Ադրբեջանի ժողովուրդը պայմանագիրը ընդունեց մեծ դժգոհությամբ։ «Իրանի հետ Անգլիայի ունեցած պայմանագրի մի հատվածը, — գրում է հյուպատոսը, — հրապարակվեց այստեղ և բոլոր դասակարգերը այն ընդունեցին մեծ դժգոհությամբ, բացի որոշ շահագրգռված խմբերից և մարդ-

²⁷ Արդուլահ Մոսթոֆի... էջ 28։

²⁸ Նույն տեղում, էջ 103—104։

²⁹ Documents on British Foreign Policy 1919—1939, First series, vol. IV, 1919, London, 1952, էջ 1933։

³⁰ «Times», May 16, 1920.

³¹ H. W. V. Temperley, A History of the Peace Conference of Paris, vol. VI, London, 1924, էջ 213։

³² Foreign Relations of the United States, 1919, vol. 2, p. 701—702։

կանցից, ինչպես, օրինակ՝ որոշ առևտրականներից, որոնք ակնկալիքներ ունեն ստեղծված դրուձյունից...»³³:

Համաժողովրդական վրդովմունքի փաստեր են հաղորդում նաև իրանական բուրժուական պատմաբանները: Օրինակ, Բահարը գրում է. «1919 թ. Վոսուգ էդ-Դոլեի պայմանագիրը Անգլիայի հետ քննարկվեց Իրանում և հարված ստացավ բոլոր դասակարգերի և պարտիաների կողմից՝ թե՛ ձախ և թե՛ աջ»³⁴: Իրանի ժամանակակից ականավոր քաղաքական գործիչ Հոսեյն Մաքքին իր «Իրանի քսանամյա պատմությունը» արժեքավոր աշխատության մեջ, պատկերավոր կերպով խոսելով պայմանագրի առաջացրած վրդովմունքի մասին գրում է. «1919 թ. պայմանագրի ստորագրումը Իրանի նոր պատմության կարևորագույն դեպքերից մեկն է: Այս պայմանագիրը նման էր մի հարիչի, որը ամուր խփվեց ժողովրդի նվազալարերին և բոլոր դասակարգերից հակառակություն ուժեղ ձայն բարձրացավ: Ժողովրդի բոլոր խավերը պայմանագրին հակառակ էին, բացի մի քանի հոգուց, որոնք Վոսուգ էդ-Դոլեի մտերիմներն ու համախոհներն էին»³⁵:

Հետաքրքրական է նաև հետևյալ փաստը, Թիֆլիսում Անգլիական Ներկայացուցիչ Վարդրուփը 1919 թ. նոյեմբերի 29-ին Քերգոնին ուղարկած իր նամակով հաղորդում է, որ այնտեղ տարածվել է Շվեյցարիայում «տապա-գրված մի «հակաանգլիական պրոկլամացիա», որը վերնագրված է «Appel au Parti national Persan» («Պարսիկների ազգային պարտիայի կոչը») և ստորագրված է Այն-Նամ-Բեր: Մանիֆեստի մեջ գրված է. «Հինգ տարի իմպերիալիզմի դեմ բողոքելուց հետո Մեծ Բրիտանիան այսօր առաջարկում է աննեքսիայի ենթարկել Իրանը: Թեհրանում ստորագրված պայմանագիրը մեզ զրկում է սեկսուսիտյունից: Ոմանք պնդում են, որ այդ կոնվենցիան վայելում է պարսիկ ժողովրդի հավանությունը: Այդ պնդումը սուտ է»³⁶:

Պայմանագրի դեմ առաջացած բողոքը այնպիսի լայն ծավալ ստացավ, որ համաժողովրդական պայքարի, և քաղաքական իրադարձությունների հետագա զարգացման հետևանքով, 1921 թ. պայմանագիրը չեղյալ համարվեց:

* * *

Այսպիսով, ինչպես տեսանք, 1919 թ. Անգլո-իրանական ստրկացուցիչ պայմանագիրը, որի իրականացումը երկիրը կվերածեր անգլիական գաղութի, լայն կերպով քննարկվել է Իրանական և Անգլիական պատմագրության մեջ: Չնայած որոշ ոեակցիոն պատմաբանների փորձերին՝ պաշտպանելու պայմանագիրը և այն ներկայացնելու որպես Իրանի շահերին ծառայող մի ակտ, հեղինակների գերակշռող մասը մերկացրել է Անգլիայի հետապնդած գաղութարարական նպատակները և Իրանական իշխող խավերի ազգայնա-քաղաքականությունը:

³³ Նոսրյն տեղում, էջ 702:

³⁴ Բահար..., էջ 30:

³⁵ حسین مکی تاریخ بیست ساله ایران جلد اول کودتای ۱۲۹۹ تا ۱۳۰۵ ۱۹۶۵ Նոսրյն Մաքքին, Իրանի քսանամյա պատմությունը, հատ. առաջին, 1969 թ. հեղաշրջումը, Թեհրան, 1945, էջ 2:

³⁶ Documents on British Foreign Policy 1919–1939, First series vol. IV, 1919, London, 1952, p. 1842: